

**Kalaallit qimmiat qimuttoq illersorniarlugu kalaallit qimmiannik qimmiutilinnut nerukkaatissarsiutaanut akileraartarnikkut ilangaammik pilersitsisinnaanerup pittaagutai ajoqqutaalu pillugit Naalakkersuisut nalunaarusioqqullugit peqquneqarnissaannik Inatsisartut aalajangiiffigisassaattut siunnersuut**

*Inatsisartunut ilaasortaq Doris Jakobsen Jensen, Siumut*

**pillugu**

**Aningaasaqarnermut Akileraartarnermullu Ataatsimiititaliap**

**siunnersuutip aappassaaneerneqarneranut**

**ISUMALIUTISSIISSUTAA**

Aningaasaqarnermut Akileraartarnermullu Ataatsimiititaliap suliarinninnermini kingullermik ilaasortarai:

Inatsisartunut ilaasortaq Hermann Berthelsen, Siumut, siulittaasoq  
Inatsisartunut ilaasortaq Múte B. Egede, Inuit Ataqtigiit, siulittaasup tullia  
Inatsisartunut ilaasortaq Mala Høy Kúko, Siumut  
Inatsisartunut ilaasortaq Aleqa Hammond, Nunatta Qitornai  
Inatsisartunut ilaasortaq Malene V. Rasmussen, Demokraatit  
Inatsisartunut ilaasortaq Peter Olsen, Inuit Ataqtigiit  
Inatsisartunut ilaasortaq Jens Napaattooq, Partii Naleraq

UKA 2020-imi ulloq 15. november 2020 siullermeerinninnerup kingorna ataatsimiititaliap siunnersuut misissorpaa.

### **1. Siunnersuutip imarisaa siunertaalu**

Qimuttunik qimmillit qimminut nerukkaatissanut aningaasartuutaasa akileraarutitigut ilanngaatigineqarsinnaalernissaanni pitsaaqutit ajoqtillu pillugit nassuiaasiornissamut Naalakkersuisut peqquneqarnissaat siunnersuuteqartup siunnersuutigaa.

Siunnersuut inuussutissarsiutiginaagu qimuttunik qimmillit nerukkaatissanut aningaasartuutaanut taamaallaat sunniuteqassammat oqaatigineqassaaq. Inuit inuussutissarsiornerminnut atatil-lugu qimminik qimuttunik atuisut qimminut nerukkaatissanut aningaasartuutimik ilanngaatiginnissaannut akileraartarnermut inatsimmi maleruagassat atuuttut malillugit periarfissaqareerput.

## **2. Siunnersuutip Inatsisartunit siullermeerneqarnera**

Siunnersuut ataatsimut isigalugu partiinit amerlanernit pitsaasutut isigineqarpoq. Ataatsimiititaliap suliarinninnerani allannguutissatut siunnersuummik saqqummiussinissamut periarfissaq oqallinnermi partiit ilaannit taaneqarpoq.

Inuit aningaasartuutaannut akileraarutitigut ilanngaateqartitsineq atonerluisoqaratarsinnaanermik nassataqassasoq, tamannalu allaffissornerunermik nakkutilliinerunermillu pisariaqartitsinermik kinguneqassasoq Naalakkersuisut siullermeerinninnermut akissuteqaamminni tikkuarpaat. Akileraarutitigut ilanngaateqarsinnaanermik aaqqissuussinermut taarsiullugu tapiisuteqartarnermik aaqqissuussineq aqussallugu piuminarnerusorinarpoq Naalakkersuisut ilassutigaa.

Kiisalu nassuiaat aaqqissuussinermut taamaattumut aningaasartuutit aammalu tapiissutinut aaqqissuussinerup qanoq aningaasalersorneqarsinnaanera pillugit oqallinnermik ilaqartinneqartariaqartoq Naalakkersuisut siunnersuutigaat.

## **3. Ataatsimiititaliap siunnersuummik suliarinninnera**

Kalaallit kulturianut qimmeq qimuttoq pingaaruteqartoq siunissaatalu qulakkeerneqarnissaa pisariaqartoq ataatsimiititaliaq isumaqarpoq.

Qimmit qimuttut siunissaannik qulakkeerinninnissamut aalajangiiffigisassatut siunnersuut una periuuserineqarsinnaasoq ataatsimiititaliaq isumaqarpoq, tassalu inuussutissarsiutiginaq qimuttunik qimillit nerukkaatisanut aningaasartuutaasa akileraarutitigut ilanngaatigineqarsinnaalernissaanni pitsaaqutit ajoqutillu qulaajarumallugit nassuiaasiornikkut.

Qimuttunilli qimmeqartarnermik kultureqarnerup tammatsaalineqarnissaanik anguniagaq aqqutit assigiinngitsut arlallit atorlugit anguneqarsinnaavoq. Naalakkersuisullu akissuteqaataat siuliani taaneqartoq naapertorlugu aaqqissuussinerit assigiinngitsut pitsaaquteqarsinnaallutillu ajoquteqarsinnaapput.

Sukumiisumik oqaluserinnereerluni ataatsimiititaliaq isumaqarpoq qimminut nerukkaatisanut aningaasartuutit akileraarutitigut ilanngaatigineqarsinnaanerannik periarfissap misissorneqarnissaa pisariaqanngitsoq.

Tamatuma peqatigisaanik qimuttunik qimmeqarnermik kulturitta siunissami piujuarnissaa qulakkeerumallugu tapersorsorneqarlunilu ineriartortinneqarnissaa assut pisariaqartinneqartoq ataatsimiititaliaq isumaqarpoq.

Siuliani allassimasut tunngavigalugit ataatsimiititaliaq isumaqatigiittoq allannguutissatut siunnersuummik saqqummiussivoq. Takuuk imm. 5-imi ataatsimiititaliap inassuteqaatai.

#### **4. Siunnersuutip aningaasaqarnikkut kingunerisassai**

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunnigortinnerani aningaasaqarnikkut allaffissornikkullu kingunerisassat siunnersuutip tunngavilersuutaani aallaaserineqassasut.

Tamanna naapertorlugu siunnersuutip piviusunnigortinnerani aningaasatigut kingunerisassat siunnersuummi nalunaarneqartut ataatsimiititaliamit maluginiarneqarpoq. Nassuiaat AC-ip ukiumi ataatsimi sulineranik naleqartussatut siunnersuuteqartumit nalilerneqarpoq. Ataatsimiititaliaq tamatumunnga oqaaseqaatissaqanngilaq.

Allannguutissatut siunnersuummut aningaasartuutissat siunnersuutaqqaartumi killiliunneqartut iluiniissinnaasutut naatsorsuutigineqarmata ataatsimiititaliamit oqaatigineqassaaq.

#### **5. Ataatsimiititaliap inassuteqaatai**

Siunnersuummut tunngatillugu ataatsimiititaliaq Naalakkersuisunut kaammattuummik imaattumik saqqummiussimavoq:

Umasunut nerukkaatissanik tunisassiornerup siuarsarneqarnissaanik kiisalu puisit neqaannik, aalisakkat perlukuinik il.il. eqqaanerup annikillissarnissaanut sakkussanik nassaarniaqqullugit Naalakkersuisut kaammattorneqarput, taamaaliornikkut taakku uumasunut nerukkaatissatut atorneqarsinnaaqqullugit. Kiisalu qalerallit motorilinnik angallassissutinik angallatinilluunniit atuinani qimussimik atuilluni pisarineqarsimasut tunisaanerannik siursaataasinnaasumik nittarsaassinissamut periarfissat misissoqqullugit Naalakkersuisut kaammattorneqarput.


Ataatsimiititaliaq isumaqatigiittoq allannguutissatut siunnersuummik imaattumik saqqummiussivoq:

**Nunatsinni qimussertarnermik kulturip ineriartortinneqarnissaanut tammatsaaliorneqarnissaanullu periusissiamik sapinngisamik qimmeqarfinnik ataasiakkaanik suleqateqarlutik suliaqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**


Ataatsimiititaliamit ilisimaneqarpoq allannguutissatut siunnersuut siunnersuutaqqaartumut sanilliulluni ilusiligaanikkut ima allaanerutigisoq allaat siunnersuutaqqaartumi siunertarineqartumik allannguilluni. Tamatuma kingunerisaanik allannguutissatut siunnersuut akuersineqarpat piviusunnigortinneqarnissaanut Naalakkersuisut pisussaaffeqassanngillat.

Taamaattoqaraluartoq allannguutissatut siunnersuummik ataatsimiititaliap saqqummiussineranut pissutaavoq suliaasaq ima nukinginnartigisutut isigineqartoq allaat sulineq sapinngisamik piaarnerpaamik allaartinneqartariaqarluni.


Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.



Hermann Berthelsen  
Siulittaasoq



Múte B. Egede  
Siulittaasup tullia




Mala Høy Kúko



Aleqa Hammond



Malene V. Rasmussen



Peter Olsen



Jens Napaattoq